

宋丞相李忠定公奏議

宋丞相李忠定公奏議卷之四十六

進道君所賜玉帶牙簡奏狀

右臣昨於靖康初奉淵聖皇帝聖旨迎奉道君太上皇帝於南京蒙恩賜玉帶一條牙簡一面簡袋上有織成小龍窠臣即時具奏回納蒙遣內侍傳宣再賜迨今十有一年奉以周旋不敢失墜今者幸蒙聖恩許令入覲獲望清光已嘗面奏道君所賜玉帶牙簡等不敢藏於私家謹用匣褱緘封齋詣通進司投進繳納御府仰塵睿覽伏望聖慈特賜矜允謹錄奏聞

小帖子

臣契勘所藏道君御畫兩軸偶忘記帶行容臣到濮州
日并淵聖所賜玉束帶差人齎赴行在投進伏乞聖察

謝賜金帶等表

星使俯臨天光下逮申賜便蕃之異數誤膺優渥之殊榮
撫已無堪拜恩增愧謝伏念臣賦材甚陋造道弗優蚤蒙
特達之知初乏涓埃之補來從疎遠過被眷私煥寶帶之
萬釘藹芳醪之九醞尚方名果御府珍庖併示寵光式昭
體貌此蓋伏遇皇帝陛下念舊不遺於簪履取材無棄於
菲封致茲湛露之恩溢及藝蕭之實功侔漢祖有解衣推
食之仁德邁周王同路車乘馬之予臣敢不激昂晚節圖

報隆化強飯據鞍自嘆庶煩之已老立朝東帶願效子華
之能言

謝賜玉鶻馬表

臣綱言伏蒙聖慈特降中使賜臣玉鶻馬一匹臣已祇受
訖天堯入覲慙非季子之歸御廐呈材濫受康侯之錫寵
踰其分愧溢于懷謝竊以晉文多修扞之功乃被周王之
賜子儀有戡定之烈是膺唐帝之恩顧臣何人亦與茲數
去軒屏而戀寵畀牧圉而增榮秀骨蘭筋騰驤磊落殊形
逸態侗儻權奇鍾流雲飛電之姿有超山跨谷之足宜膺
駕御即以和驚以昇瑣材實謂非稱此蓋伏遇皇帝陛下

法天臨下以道觀能起臣於閑廢之中賜臣以清燕之對
禮加三接恩解左驂憫其驅馳之勞予以安閑之乘而臣
衰頹已老結約亡奇修我戈矛莫豫宣威於沙漠歸于丘
壑終期解縱於渭濱

論進兵劄子

臣近者伏蒙聖恩許令入覲特御內殿三賜引對踈遠之
跡得望穆穆清光於咫尺間從容移時仰聆玉音俯竭愚
悃臣子之情不勝欣幸然進對之久恐勞聖躬加以言詞
拙訥敷奏迂踈猶有未能盡其底蘊者敢昧死以聞臣本
書生初不知兵自靖康以來竊見朝廷軍政不修致有失

之禍夙夜以思欲振起中興之業爲自治自疆之計非
兵不可昔蘇軾當熙寧元豐間著論深戒用兵使軾生於
今日則必以兵爲先務何則所遇之時異也然其家多故
千緒萬端有奇有正變動無方能讀其父書者未必能施
於行事不讀古兵法者未必不暗合孫吳顧所以用之者
如何耳臣嘗推原古人用兵之意比較今日主兵者之失
大略有四夫兵貴精不貴多多而不精反以爲累故昔之
善用兵者料簡至精率能以少擊衆如千將鏖鄒迎刃而
斷莫之敢櫻其與頑鐵豈可同年而語哉王邑百萬而破
於光武之三千符堅百萬而敗於謝玄之偏師用此道也

又況將兵如將將多多益辦唯韓信能之自餘各有分量
今之諸將貪多務得見他人之兵則垂涎以務并吞初不
自量其智力果能節制運動如身之使臂臂之使指乎否
也冗食既多坐耗國用疲劣弗簡遇敵先奔一大將連十
數萬之衆未聞有敢深入而建奇功者此不務精而務多
之過也將貴謀不貴勇勇而不謀適為敗擒故昔之善將
兵者或深謀於己或廣謀於人韓信背水而陣示以大將
旗鼓使敵趨利拔趙幟而奪其城遂以破趙將士皆莫能
知此深謀於己也得李左車西向而師事之遂傳檄而定
燕齊此廣謀於人也周亞夫亦然其謀於己則堅壁不戰

以困七國之師志慮一定雖梁孝王不能奪者是也其謀
於人則聽趙涉遮說走藍田出武關抵洛陽直入武庫擊
鑼鳴鼓而駭諸侯者是也善將者莫不如此今之大將號
為出群帥之右者不過勇猛敢進未聞長慮却顧虛心下
士以謀為先者求其據形勢中機會料敵制勝不戰而屈
人之兵豈可得哉此不務謀而務勇之過也陣貴分合合
而不能分分而不能合皆非善置陣者諸葛亮以石布八
陣圖於蜀江水中晉大司馬溫見之曰此常山蛇勢也擊
首則尾應擊尾則首應擊其中則首尾皆應非能分能合
何以至此自金人憑陵以來未聞諸將有與之對壘而戰

者率皆望風奔潰間有略布行陣為其突騎所衝一散而不復合於古人置陣之意豈不相遠哉魚麗偃月平銳曲直陣形雖殊其欲能分合一也合而不能分則非所以適變分而不能合則潰而已矣古之陣法皆能制敵於部伍曲折之間故諸葛亮以之擒縱孟獲李光弼以之大破史思明而今之陣法徒為文具而不適用此不務分合之過也戰貴設伏而直前使敵無中斷邀擊之虞皆非善戰者北戎侵鄭鄭公子突謀為三覆以待之袁戎師前後擊之盡殲昔之善戰者未嘗不以設伏為先山川林莽薈蔚深窾皆可伏兵或誘之以利而使前或示之以怯而使逐薄

於險阻之地擊其首尾而不得相援斷其腹心而不能相
應如猛虎陷於機穽之中齧駭狼顧鮮有不甚敗者今之
諸將或有與敵相遇惟務力爭不求謀勝雖有小獲未聞
有能大殲醜虜者此戰不設伏之過也是四者今日諸將
之失願陛下明詔之使知古人用兵之深意則於折衝禦
侮致果殺敵之方非小補也昔高祖駕御韓彭英盧如指
蹤獵狗而得獸光武駕御寇鄧耿賈所向無不成功陛下
十數年來委任諸將不愛高爵重祿以得其心分以堅甲
利兵以作其氣駕御之術固非愚臣之所能測識然竊見
朝廷近來措置恢復有未盡善者五有宜預備者三有當

善後者二臣荷恩之深嘗蒙聖慈特降親筆有宜因疾置
時告嘉猷之語苟有所見其敢隱藏請試爲陛下詳言之
何謂有未盡善者五夫興師十萬日費千金聚人必以財
理財必以義以朝廷之威擅天下之利勢而欲措置財用
使養兵不乏何施不可善制國用者有生財之道有節用
之法有救弊之說有覈實之政有愬遷之術有閭閻之權
審此六者則雖養兵之多何患乎財用之不足而朝廷初
不留意於此唯取於民之爲務降官告給度牒賣戶帖理
積欠折帛博糴預借和買名雖不同其取於民一也上戶
肩產不足以供買官資之數配下戶絕食不足以應料斗

片之誅求物力耗屈人心驚疑如居風濤洶洶靡定夫民
爲邦本本固邦寧基址薄則棟宇有傾危之憂水泉涸則
魚鼈無生養之理爲父母而日削其子飽腹心而有戕其
肌欲求久安其可得乎昔唐德宗急於用兵而有除錢陌
稅間架之令遂致奉天之變今日誠不可不以爲鑒此未
盡善者一也夫千里餽糧士有飢色樵蘇後爨師不宿飽
軍旅之興糧餉爲先而去年自江以南縣地數千里適有
旱災粒米惟艱穀價翔踊飢民餓殍相望於路雖浙西號
爲豐稔然以一路而供江湖數路之求勢亦安能有餘朝
廷鑼買數目雖多亦未必能豐衍王師一動運漕飛輓何

以能給議者謂當因糧於敵臣竊以爲不然使敵人聚糧
或有敗北焚蕩而去必不使爲我有糧道不繼爲患甚大
若欲取於僞地之民則官軍抄掠甚於寇盜有違弔伐之
義失民望而堅從賊之心非計之得此未盡善者二也金
人專以鐵騎勝中國而吾之馬少特以步兵當之飄暴衝
突勢必不支平時不務有可以制鐵騎之術而亟欲興舉
夫工欲善其事必先利其器況於戰陣之際國家安危所
繫豈可忽哉此未盡善者三也夫用兵如奕碁先能自固
乃能殺敵根本之地當以重制輕乃能安全臂指之勢當
以大用小乃能運動今朝廷興諸路之兵悉付諸將外重

六韜指大臂小平居已不能運掉則緩急何以使之捍患
而却敵哉兵猶博也本多乃勝善博者徐出以待時今乃
罄所有以事一擲其可乎此未盡善者四也臣於陛辭日
竊聞麻制以韓世忠岳飛為京東京西路宣撫使聖意可
謂斷矣然兵家之事行詭道驚鳥之搏必戕其翼猛獸之
攫必匿其爪藏殺機也今者不得已而用兵不知欲敵人
之知乎欲敵人之不知乎欲敵人之為備乎欲敵人之不
為備乎事固有先聲而後實者然既有其實乃可先其聲
昔韓信虜魏王禽夏說不旬朝破趙二十萬衆誅成安君
於泜水上故能發一乘之使奉咫尺之書使燕齊從風而

靡有其實故也今吾軍初未嘗有其實而遽以先聲臨之其可乎此未盡善者五也何謂宜預備者三中軍既行宿衛單弱肘腋之變不可不虞此行在不可不預備者一也江南東西荆湖南北兵將盡行屯戍鮮少敵人或有乘間擣虛之作則將何以待之此上流不可不預備者二也海道去京東不遠乘風而來一日千里蘇秀明越全無水軍則下流不可不預備者三也何謂當善後者二夫勝負兵家常勢有勝必有負勝之非難持久為難而況於負哉籍使王師克捷能復京東西地則當屯以何兵守以何將金人來援當何以待之兩路之民懷戴宋之心有來蘇之望

久矣既得其地而吾之力足以覆護之此當善後者一也
萬一得其地而不能守得其民而不能保兩路生靈虛就
屠戮使兩河之民絕望於本朝則恢復之功難為力矣昔
宋武帝長驅以復關中而卒不能有惟其善後之策不先
定故也善奕者其置子之意乃在於數十著之先豈臨事
而後慮哉勝猶如此則所以圖為善後之計者宜如何哉
此當善後者二也陛下天縱英武念二聖於漠北出自睿
斷圖此武功事勢既然必不得已臣願獻愚計軍政既修
莫若小試勒兵於山東夫山東天下之陸海也賊獫狁之
以為根本之地與吾淮南境土相接河渠相通士馬易行

糧餉易致宜令韓世忠率師先臨繼遣劉光世為之策應
張浚分兵以防江岳飛重兵且屯襄陽勿輕動以牽制其
師使不得應援募敢死將士由海道以擣其腹心擇要害
之地控扼以斷金人來援之路京東郡縣必有起而應者
撫綏料理務盡其術京東可保乃可徐事京西此今日之
至計也臣蒙陛下面諭以十數年來訓練士卒今方可用
臣退而詢之士大夫咸以為然區區愚慮尚有可疑者以
謂吾之士卒初未嘗與大敵力戰則欲保其臨敵用命無
奔潰之虞猶未易也金百鍊則為精金卒百戰則為精卒
故臣欲試之山東者使戰得一勝則士氣百倍棄破竹之

勢所向無前矣惟陛下裁幸昔周宣中興北伐則夷儼抗
南征則平淮夷宜乎意氣勇銳舉電發然常武之序曰
有常德以立武事因以爲戒然則知有此武功未嘗不以
誠一之德爲主也夫其進銳者其退速物理之自然兵威
方強志慮太銳一有挫衄遽自退屈豈可謂之常德哉高
祖與項籍戰其喪師跳身者屢矣然卒以此勝堅忍而有
常故也昔魏相之告宣帝曰救亂誅暴謂之義兵兵義者
王敵加於已不得已而起者謂之應兵兵應者勝事恨小
故不忍憤怒者謂之忿兵兵忿者敗利人土地貨寶者謂
之貪兵兵貪者破恃國家之大矜民人之衆欲見威於敵

者謂之驕兵兵驕者滅相之論可謂切當夫兵以義起以
應動而不忿不貪不驕是謂常德此帝王之所當盡心也
伏惟陛下留神幸察臣昨在靖康中與聞國論當是時豈
不願和但欲和得其是則兩國生靈皆賴其利今日朝廷
之議臣雖不得而與然聞之士大夫亦頗得其梗槩矣臣
素以治兵爲然豈不願戰但亦欲戰得其是則中興之業
自茲以始夫天下士民凡有知識者孰不願陛下以戰則
勝以守則固而早致中興之功獨議和者不然袖手旁觀
惟覲一有差失以售其說臣願陛下以持重用兵以多籌
取勝而無爲議和者之所幸天下不勝幸甚取進止

貼黃

臣竊謂朝廷用兵有橫議沮師者罪固不可赦至於
陳獻利害欲彌一闕失助成大功則宜特留聖意曲
賜嘉納庶幾有智慮者皆願自竭有補國事伏望聖
察

進道君御畫并淵聖所賜王帶奏狀

具位臣李綱

道君太上皇帝御畫二軸淵聖皇帝所賜王束帶一條
右謹用匣二隻盛貯黃綾袋複封全隨狀差人齎詣通進
司投進繳納御府伏望聖慈特賜矜允謹錄奏聞伏候勅

旨

進道君御畫及淵聖所賜玉帶劄子

臣近蒙聖恩召赴行在奏事特於內殿引對臣竊見陛下
思慕兩宮欲見之於羹牆臣子之情不勝激切嘗以道君
皇帝所賜御筆一軸玉帶一條牙簡一面繳納御前庶幾
真蹟故物仰經睿覽少慰陛下孝思之萬一今者又以所
藏道君皇帝御畫二軸淵聖皇帝所賜排方玉束帶一條
具奏詣通進司投進外竊念臣當靖康間蒙兩宮知遇異
於等倫所得賜物十襲以藏常恐失墜今得復歸御府不
至流落人間莫大之幸取進止

奏議四十六卷終

宋丞相李忠定公奏議卷之四十七

謝到任表

臣綱言伏奉告命除臣江南西路安撫制置大使兼管田
大使馬步軍都總管兼知洪州軍州事兼管內勸農使臣
已於今月二十三日到本路交割職事訖者起膺分閫濫
當江表之十連入覲行朝誤蒙晝日之三接祇奉丁寧之
訓勅敢辭疲役之驅馳已見吏民布宣德意謝中伏念臣竊
駘陋質樗櫟散材叨考爰於風雲感會之初迄無善效備
使令於盜賊披猖之際頗著微勞甘心流落者十年編管
艱危者萬狀茲蒙起廢來從寂寞之濱更許造庭賜以清

燕之對撫勞優渥寵賜便蕃凡鑠金銷骨之謗誣皆見賜
從風而散釋迨承臨遣深軫皇慈乃眷大江之西近接長
淮之境屢更兵火繼以旱災流移衆而田萊多荒科歛煩
而物力耗屈欲禦寇則軍馬單弱將養兵則帑藏空虚疆
場弗寧盜賊未殄付以捍患禦災之政宜得通方適變之
材顧臣何人乃預茲選此蓋伏遇皇帝陛下日躋盛德天
覆群生旣諒臣之忠誠故委之以要害之地欲試臣以民
事乃任之以艱窘之時而臣命蹇數奇材疎志廣然始維
持於一意俯仰無愧於此心使足食及兵而可爲盡瘁敢
忘於夙夜儻求牧與芻而不得乞骸願返於山林

親筆賑濟詔書

朕以諸路去歲旱災深慮細民艱食而州縣府庫空虛未知拯救之術慨然在念夙夜不忘惟吾帥守監司委付一路分朕憂顧者也必不忍坐視不恤其協力悉心多方勸誘積米之家俾其食用之餘盡以出糶尚庶幾接濟數月流殍之苦務脩乃職以副朕意付李綱

遵稟賑濟奏狀

右臣今月二十二日准御前金字牌降到親筆詔書付臣令勸誘積米之家俾其食用之餘盡數出糶以濟流殍之苦仰見聖慈矜憫元元欲濟其艱阨者如此其至臣已遵

稟睿訓措置勸誘出榜置厯差本司屬官分詣諸州委知
通縣官召上戸有積米之家使其自陳自指揮到日見有
積米之數許其乞留若干食用其餘依京價量減盡數出
糶外臣契勘積米之家減價出糶止是可濟有錢糶米之
人其流移之民無錢糶米官中見行賑給米數不多前歲
秋成尚遠難以接濟臣已一面措置多方勸誘上戸情願
納錢米入官以助賑濟者許其陳乞官告度牒之類折
價直候見數目容臣續具奏陳乞賜支降給還庶幾
不致乏食實爲利便

謝賜親筆賑濟詔書表

臣綱言伏蒙聖恩以本路旱災之後小民闕食特降親筆
詔書付臣勸誘積米之家出糶接濟食用以恤流殍之苦
臣已遵依睿訓措置施行者倬然雲漢之章光臨下土霈
爲雨露之澤惠浹遐方濫分千里之憂幸拜十行之賜謝
竊以抑高舉下者天之道博施濟衆者仁之方觀易象有
裒多益寡之文論政術有知予爲取之寶顧茲江右星分
翼軫之躔偶值歲凶民乏饑饉之積竭倉廩之儲以賑之
而不足勸停蓄之家而利之則有餘深軫皇慈特頒宸翰
飢民銜德而巳有飽意富室聞風而去其吝心豈惟流殍
之餘得全性命將見精神之格復致和平此蓋伏遇皇帝

陛下所寶者慈以民爲貴憫赤子之難阨降玉音之丁寧而臣濫總帥權幸承德意兩賜時若方厥壤之可游稼穡繁滋欣有秋之在望

乞於戶帖錢內支十萬貫充營田本錢奏狀

右臣伏蒙聖慈特降告命除臣本路營田大使臣近因進對已嘗具劄子進呈營田事件已蒙朝廷降付都督行府措置外臣竊惟屯田之策尤便於艱難用兵之際其用力雖勞而見功博故漢趙充國行於金城魏棗祗行於許下晉杜預行於襄陽皆能坐制敵人以收成功今日欲建恢復之策營田誠不可緩也臣頃者承乏荆湖廣南宣撫

於潭州管下剗刷拋荒田土得數萬畝招降到步諒等
人兵除放散外擇強壯者刺手爲軍得萬三千餘人又於
群盜軍中得牛數百頭方欲措置營田爲上流控扼久遠
之計而臣以人言罷去其事遂寢至今以爲恨今者朝廷
講明利害諸路並置營田使推行其法誠爲得計然臣竊
謂良農治田必先有本乃可圖利今江西一路累經兵火
之後拋棄絕戶荒田頃畝不可勝數皆係膏腴盡爲荆棘
之地臣除已行下州縣剗刷應干拋荒田土所有召募人
戶墾生墾闢收買牛具借貸糧種所費不貲自非朝廷寬
給錢本何以克濟伏望聖慈特降睿旨旋賜本錢十萬貫

奏議卷之四十七
充管田之本先試行於洪州管內候稍就緒漸令他郡倣
倣施行將來見效紐計本息以本還朝廷以息充本路養
兵之費遇有羨餘亦可補助國用庶幾實利不爲虛文仰
副陛下委任之意

小帖子

臣所乞管田錢本如蒙聖慈矜允乞於權貨務或本
路戶帖錢內撥見錢十萬貫如官告度牒之類決難
轉變無補於事其餘合條陳事件候朝廷降到錢本
日許臣畫一條具申請伏乞聖察

乞於江東浙西州軍支米三萬石應副本路賑濟

奏狀

右臣准尚書省劄子新江南西路安撫制置大使兼管田
大使兼知洪州李綱劄子云云勘會已降指揮於饒州上
供米內取撥一萬石及本路上供米內更支撥一萬石應
副賑濟外二月二十九日三省同奉聖旨令將撫州建康
軍糴到米取撥隨宜賑濟劄送臣照會即時行下逐處官
司遵稟聖旨指揮施行據撫州建昌軍申安撫司分撥到
官告度牒糴賑濟米除節次支撥外見在數目不多其朝
廷元降指揮於饒州上供米內取撥一萬石應副賑濟據
饒州公文稱本州並無見在米斛即不曾支撥到應副賑

濟竊緣本路旱災之餘民戶乏食累奉詔旨及朝廷指揮
督責賑濟今來撫州建康軍見在數目不多饒州上供米
又不曾撥到委是賑濟急關官吏坐視無所措手伏望聖
慈特降指揮於江南東路及兩浙西路州軍朝廷見有米
斛椿管去處支撥米三萬石令本路差官及自差人船前
去般取仍乞嚴降指揮諸路官司不得占吝候本司差到
官吏人船日即時交量應副庶幾下戶及流移飢民有以
接濟仰副陛下加惠元元之意

乞蠲免災傷路分人戶四年積欠劄子

臣已到江西本路界首交割職事延見父老詢問民間

苦皆云去歲旱傷之後穀價翔踊民間乏食第三等戶止是粥第四第五等戶多是掘草根而食官中見催紹興四年積欠無從可出臣契勘下戶積欠有一二十戶合納一石者雖數目不多然民無從出復有公吏須索之擾情實可憫伏望聖慈特降睿旨將災傷路分第三等已下人戶紹興四年積欠特與蠲免或權行倚閣候秋成日隨苗送納庶幾仰副陛下加惠元元之意

乞差兵將討捕虔吉盜賊及存留李山彈壓奏狀
右臣據徽猷閣直學士左朝散大夫充江南西路安撫制
置使兼馬步軍都總管胡世將申統領官丘贊人馬本司

已依奉聖旨發遣權聽岳招討前去使喚去訖今據吉州
申據永新縣申有兇賊郭少二等煽聚三百餘人在安福
縣陳會山及有賀小大賀小二等結集三百餘人在永新
縣斬山往來兩縣殺人虜劫作過并龍泉縣申有賊人周
花八等結集二百餘人在地名舊塘及永新縣界官北等
處殺人放火并永豐縣申有譙花三等二百餘人在鄉放
火虜劫及廬陵縣申被永新縣會山周花八手下殘黨郭
二郭四等計一百餘人入管界地名梅花燒劫殺人作過
乞差軍馬前來討捕防遏臣與勘近因進對具劄子乞依
元降安撫大使畫一指揮差兵二萬人數內先差一半付

本路應副使喚索朝廷關送都督行府至今未奉指揮臣
只將帶到朝廷先差付本路統制官申世景一項軍馬人
數不多今據前件申報吉州永新縣等處盜賊作過六頭
項已一千餘人委是闕兵分頭前去措置討捕旱歲飢民
易爲嘯聚若不乘時撲滅漸致滋蔓決須殲厥後來難以
殄滅伏望聖慈特降睿旨日下於近便處先次摘那差撥
兵將二千人付臣相兼使喚庶幾不致誤事

小占子

如蒙聖慈矜允乞用金字牌降下聖旨指揮庶使早
得被受 又

契勘虔州管下依舊盜賊出沒作過本處只有岳飛
下統制官李山軍兵一千餘人在彼討捕今准都督
行府指揮許令岳飛抽回竊慮官兵起發之後兇徒
愈更嘯聚與吉州群賊相應猝難勦除伏望聖慈特
降睿旨且存留李山在虔州彈壓措置候朝廷別差
到軍馬即令起發前去

乞將立贊下存留洪州軍兵克親兵奏狀

勘會本司舊管親兵兩軍計八百餘人馬七十餘疋內一
項軍兵三百餘人馬五十餘疋據撥隸統領官立贊軍部
請哀同教閱并有一項統領官高道所管五百人馬二十

於去年二月內係岳飛權將帶前去湖南捉殺後來
事畢更不曾發還本司今來立贊一軍近奉聖旨指揮撥
付岳飛使喚除見存留軍兵三百人在洪州外自餘人馬
并老小盡數將帶前去雖象都督行府指揮令存留五百
人共二百人亦未曾差到即目帥司並無親兵使喚伏望
聖慈詳酌特降睿旨只乞將上項立贊下存留軍兵三百
人依舊還本司作親兵使喚仍乞下岳飛發還逐人老小
前來洪州安泊

小帖子

契勘本路前任安撫大使除帥司自管親兵外有差

破樞密院軍兵一百五十餘人今來本司並無親兵
伏乞聖察

乞依呂頤浩劄於隣路撥米賑濟奏狀

右臣近爲本路去歲旱災所養飢流民至廣倉廩無儲尋
具奏聞乞於建康府宣池等州常平義倉米內通融借撥
米斛候將來秋成撥還及乞將撫州建昌軍官告度牒糴
到米一萬四千餘石隨宜撥充諸州賑濟續准尚書省劄
子勘會已降指揮於饒州上供米內取撥一萬石及於本
路上供米內更支撥一萬石應副外二月二十九日三省
同奉聖旨令將撫州建昌軍糴到米取撥隨宜賑濟臣

臣曾到饒州狀稱本州上供米斛除災傷減及已支俵外別無見在數目并撫州建昌軍所糴米又已科撥付諸州雖有見在數目不多臣已再具奏聞乞於江東兩浙路豐熟州軍見椿管米內支撥三萬石應副未奉回降指揮伏見湖南安撫大使呂頤浩近蒙朝廷於隣路廣西州軍支米三萬石應副竊緣本路旱傷闕乏與湖南路一體一同今來若不申告朝廷支降委是無可賑給下戶飢民趁時耕種將來秋成更無指準伏望聖慈詳酌特降睿旨許依呂頤浩例於鄰路江東或兩浙州軍支撥米三萬石許本路差雇人船前去般取付臣科撥賑給庶幾實惠可及

下戶將來歲事有望不致闕誤

永濟李忠定公

宋丞相李忠定公奏議卷之四十八

畫一措置賑濟胥并繳奏狀

契勘本路去歲旱災尤甚今正當新陳不接之時米價翔踊細民闕食下戶流移無本耕種上軫聖慮累降德音督責監司守令廣行賑濟今月二十二日被受御筆詔書卽文令帥守監司多方勸誘積米之家以其食用之餘盡數出糶庶幾濟此流殍數月之苦當日又准尚書省劄子備奉聖旨指揮節文停蓄之家尚敢不從勸誘依前閉糶臺度輕重一面斷遣除已備錄全文印榜曉示外今具遵依聖訓措置勸誘下項

一本路逐州軍使司各置印曆一道差官分詣委自知
通行下諸縣每縣州給印曆一道備錄使司指揮差
官分詣監督令佐分定鄉分躬親就鄉詢究的實有
米人戶使其自陳截自指揮到日見有積米之數許
乞存留若干食用外其餘盡數依市價量減旋行出
糶責令隣保對定著實有米人戶於曆上親書著字
所委官限五日周通赴縣攢數令佐統曆同書結罪
次日繳納本州本州總諸縣之數抄上使司給到文
曆內除認數不多或認數多見得已是情願出糶之
人更不須召赴本州外將自餘有米數多責認未定

之人仰縣令將帶同赴本州知通限當日審實更加
勸誘合存糶數目如有認糶米數三千石以上依得
二月八日檢會到紹興元年五月十四日該補官實
之人即取縣官保狀當官先次給與空頭付身候糶
足日赴州書填其以次數多之人糶及二千五百石
與補進勇副尉二千石與補守闕進勇副尉一千五
百石與免將來差科三次一千石與免將來差科二
次五百石與免將來差科一次如敢吝惜不肯出糶
拒抗官司之人審究見在着實盛頒米穀去處盤量
見數具情節申取使司指揮當議酌情斷遣枷項號

令

州縣已勸誘到上戶及有米之家出糶米數每升依
逐粳市價減十五文出糶遇市價減落再令量將城
郭鄉村之家給曆每口不過一升分定出糶人戶乏
食之家糶曆或五日或十日一次前去糶米其有米
之家收錢糶米並書曆着字為憑不即特出糶許糶
米人赴官申陳候糶絕日計數申官司取曆照驗結
算都數如有糶糶不實諸般欺弊搔擾並委知通縣
令檢察施行

一今來勸誘上戶及積米之家減價出糶止是可濟

錢糴米之人其流移飢民與下民無錢糴米之人官
中見行賑濟支過米數已多前去秋成尚遠難以接
濟今措置委自知通縣令多方勸誘上戶及有積米
之家如有情願納錢米入官以助賑濟者許以其入
納之數陳乞官告度牒之類依價折還一戶所納價
不足即許衆戶結甲同共細計陳情其入納數目浩
瀚之人當議特行奏請優與推恩亦仰願入納人戶
於管上親書着字為據其入納米即於出糴米內除
豁施行仍依紹興五年十二月十日本路轉運司已
得勸誘入納指揮許候受付身訖作官戶免身丁等

事

一今來勸誘止係上戶有物力及停蓄積米之家其中下戶有些小食用米穀即不得一例前去巡門抄劄以至搔擾

一縣官親詣諸鄉詢究有米之家責令隣保對定合存留食用并合出糶之數務要不擾取見的確若有失實或因緣為姦稍涉違戾作弊並從諸司按察移文本司備申朝廷先次差替取勘施行

一縣官親詣鄉村檢察所帶人從不得過十人每人日支米二升錢五十文省令不得容縱作過并差公人

弓手下鄉因緣搔擾使司除已差人密行體探外委
自知通覺察申舉公吏並行決配

一勸誘胥到限十日勸諭了當其地遠戶多縣分許量
展日限捐角實封專差人齎詣使司聽候指揮其給
胥羅羅郎仰一面措置施行

右臣今月二十二日准御前金字牌降到親筆手詔及同
日又准金字牌降到尚書省劄子指揮勸誘積米之家出
糶米斛接濟飢貧下戶等事臣除已遵稟聖旨同轉運司
官商議措置備錄印造文榜及措置到勸誘畫一事件各
置印曆一道專差人齎付洪爰等一十一州軍收管差委

強幹官分下諸縣逐一依憲多方勸誘務要實惠及民接濟下戶仍令多印文勝散給鄉村曉諭去訖臣竊慮逐州當職官不切遵稟舉行減裂亦已分差官前去諸州逐一檢察如有違戾去處別具因依奏効施行外今錄白措置勸誘畫一事件一本在前

小帖子

臣契勘今來勸誘減價出糶米斛止是可濟有錢糶米之人其流移飢民無錢糶米官中見行收養見在米數不多前去秋成尚遠難以接濟及下戶無本可以種田之人官中亦無錢米可以借貸臣已行措置

勸誘上戶有物力之家如有情願納錢米入官以助賑濟借貸者許以其入納之數陳乞官告度牒之類依價折還若入納數目浩瀚之人別行奏乞優與推恩外伏望聖慈許臣候見得有入納之數遂旋具合折還官告度牒等申奏朝廷乞行給降仍乞依紹興五年十二月十日日本路轉運司已得勸誘入納指揮許候受付身訖作官戶免身丁等事庶幾易於激勸飢民不至乏食下戶可以趁時耕種將來秋成可望不誤歲計

臣契勘勸誘雜米依先降指揮及三千石已上各有

補授名目外其不及三千石之數即未有明文竊慮
無以激勸臣已相度一面行下諸州勸誘如糴及二
千五百石與補進勇副尉二千石與補守闕進勇副
尉一千五百石與免將來差科三次一千石與免差
科兩次五百石與免差科一次外欲乞候見得有出
糴及上項數目之人除免差科從本司給據行下州
縣施行外其補進勇副尉及守闕進勇副尉許臣一
面出給公據具姓名奏朝廷乞給降付身伏望聖慈
特降睿旨施行

乞將贍給立資軍錢還充申世景支遣奏狀

契勘近蒙朝廷差申世景一軍前來洪州駐劄權聽本司
節制使喚所有合用錢糧已一面牒漕司契勘將元養
丘贊軍錢糧窠名應副及其因依奏聞乞行轉運司撥
去訖近又承漕司回文行下洪州撥辦支給今月初六日
續准尚書省劄子鄧文為承都督行府關欲將丘贊一軍
合用錢糧內米依數撥留充申世景支遣外其合用錢數
令江西帥司依舊應副津發前去岳飛軍前三月二十二
日奉聖旨依其申世景合用錢令戶部科撥申尚書省契
勘申世景人馬已到洪州見用贍給丘贊錢糧窠名日旋
收撥支給尚自不足所有本路諸州應諸色上供經制折

帛係省不係省等錢一切盡係漕司拘椿指定科撥充岳
飛大軍等支用除外別無支使不盡窠名寬剩錢物兼本
司所賣鈔引內除廣塩鈔已住罷及若引出賣不行外雖
茶引稍有客人入納節次准朝廷支降應副轉運提點等
司即目猶有積壓下八萬餘貫未支竊慮戶部不見得本
路別無空閑名色錢物科撥虛數行下無可取撥有誤軍
食伏望聖慈詳酌臣前奏及今狀事理特降霽旨只乞將
元贍立贊軍錢充申世景支遣其立贊合用錢數却乞將
元應副申世景錢從朝廷支降徑發輕齎往岳飛軍前庶
幾不致妨闕

乞將本路災傷州縣合起折帛錢依條限催納奏狀
右臣今月初四日到本任交割職事初六日承都轉運司
公文准尚書省劄子節文勘會本路合發折帛錢元責限
三月椿足係指擬應副大軍欲督責兩漕臣拘催日下並
要起發盡絕奉聖旨依仍展十日檢准紹興勅諸稅租日
限江南東西路夏科五月十五日起催八月十五日納畢
又勅諸人戶輸納有期限而官司輒促其常限者徒一年
因至逃亡加一等洪州於去年十二月九日准尚書省劄
子勘會江西合納夏稅及和買物帛每歲例係量度分數
折納價錢其紹興六年分人戶折納之數未曾立定折納

之數理合預行措置以便人戶輸納十二月八日奉聖旨
除淮水并絲更不折錢外其餘紬絹綿並以十分為率絹
二分紬四分綿三分仰趙子直預先依此分明開坐行下
所部州縣候來年合入輸納物帛條限即依今來立定名
色分數折納見錢仍仰從第四等已下人戶折納如不足
即通第三等人戶納錢其合納本色物帛亦仰依限催理
送納起發前去郢州今年二月初三日奉本州承轉運司公
文准諸路軍事都督行府劄子鄭文今歲合起折帛錢限
三月已前收椿數足計置發往郢州下邳今來又承前件
三月二十九日指揮合至四月初十日限足竊緣被受指

擇已是四月初八日其折帛錢雖已行下催促並未納到
必致有違朝限臣契勘本路人戶合納今年夏稅和買物
帛朝廷元降指揮立定分數從第四等已下折納價錢依
條限催理係是優恤下戶以便輸納今來催納限至四月
十日了畢正是蠶麥未熟新陳不交之時下戶何由了納
况本路所管諸州去年亢旱尤甚洪吉筠袁江撫州興國
臨江軍皆是災傷至重去歲所有第四等已下人戶多是
貧困官中見行抄剗給米賑濟之人何緣更有積蓄非特
預行輸納若復州縣逐急措置先從上戶有力之家預催
折納見錢即將來合輸本色之數却當於第四等已下人

戶催科顯見重困必至流移折害非細臣竊讀近降親筆
詔書令勸誘積米之家出糶以濟流殍之苦加惠元元誠
意惻怛今來所降指揮如此何以取信於民伏望聖慈特
降睿旨將本路災傷州縣合起折帛錢依條限催納其不
係災傷去處自依今來立限指揮庶幾下戶得被實惠不
致逃亡臣已行下災傷州縣更切聽候朝廷指揮

乞催起岳飛軍馬劄子

臣訪聞岳飛已丁母憂飛孝於其親將來朝廷起復辭免
往來必費日月伏乞早降處分兼諸路錢糧多起發往鄂
州交卸勢須先屯重兵及措置倉庫安頓去處又自漢

至郢州千有餘里與偽境相隣須有軍馬防護糧道方可
無虞臣仰荷眷知苟有所聞不敢不奏伏望聖慈特降
旨速賜施行

宋丞相李忠定公奏議卷之四十八

宋丞相李忠定公奏議卷之四十九

措置招軍畫一奏狀

准樞密院劄子諸路軍事都督行府開樞密院關內降付
下新江南西路安撫制置大使李綱劄子奏臣契勘朝廷
昨降江南西路安撫制置大使畫一指揮差兵二萬人紹
興三年分有兵一萬八千人後來節次撥隸都督府韓世
忠岳飛等軍四年分有兵一萬五百人五年二月內指揮
除存留立贊一軍外其餘軍馬並撥付岳飛今來本司所
管立贊軍馬不滿二千入馬一百餘疋近又撥隨岳飛前
去使喚雖蒙朝廷却差申世景軍馬於本路駐劄纔千餘

人馬數十疋竊見江西路分控扼上游與淮南相接道里
不遠昨來金人賊馬渡江首犯洪撫等州李成馬進等亦
破江州侵犯洪筠蓋緣兵力單弱不能捍禦朝廷灼見利
害因建大使付以重兵使任一路之責累年脧削存留僅
及十分之一又皆疲弱之兵緩急不可倚仗萬一強敵侵
陵江上不知何以使之鎮撫要害之地況今屢吉盜賊累
年出沒作過為患數路討蕩未平非有可用軍馬卒難殄
滅臣未敢乞依元降畫一指揮差撥數疋若蒙朝廷先次
差撥一半使及萬人庶使稍成軍制可以倚仗伏望聖慈
降旨選差近上統制官將帶所部軍馬赴本路駐劄

臣節制與申世景軍馬通計人數其餘乞許臣踏逐
朝廷抽差庶幾訓練習服軍聲稍振鎮壓一路折衝禦侮
少副陛下委任之意右關送諸路軍事都督行府右勅會
大兵見今屯駐江淮應接措置防捍欲將本路見闕禁軍
令帥司措置招填闕額除本路將兵自合全將專聽帥司
差撥外據本路不係將兵見管人存留一半本處使喚餘
一半令大使司選差逐州軍兵官一員別作一項訓練遇
有缺從帥司勾抽本司按閱若遇緩急合要人兵使喚即
行勾抽與已差申世景官兵相兼使喚如赴帥司按閱及
緩急差撥其軍兵並依例分掣家糧外每日添支食錢五

十文候將來防秋日即相度調發軍馬前去本路已上所
差禁軍並係本路人額其錢糧自合本路應副合用軍器
令帥司一面措置造作支用如有合行事件條具申取朝
廷指揮令關送樞密院指揮右劄送本司依都督行府關
到事理施行本司契勘昨置安撫制置大使降到畫一指
揮差兵二萬人係在本路係將不係將兵之外今來所乞
二萬人一半人數蒙朝廷降到都督行府指揮候將來防
秋日調發前去却令措置招填本路係禁軍關額今依應
備具關額人數並措置招填事件下項

一係將兵一十指揮計五千一百人已有三千九百

十三人見闕一千一百六十七人

虔州八指揮見管三千三百六人見闕一千四十四人
吉州兩指揮見管八百九十七人見闕一百二十三人
已上將兵承今來指揮令帥司措置招填開額自
合全將專聽帥司差撥使喚欲乞令遂州並本將
限一季撥闕額招填如招填不足即從本司措置
量增例物招填訖發赴本將填闕

一不係將兵共二十一指揮計七千五百四十一人已
有三千三百三十五人見闕四千二百六人

洪州七指揮見管六百一十七人見闕二千三十三人

江州三指揮見管四百六十四人見闕五百三十三人
撫州兩指揮見管七百四十一人見闕一百七十九人
筠州一指揮見管二百五人見闕一百五人
袁州一指揮見管三百一人見闕九人

臨江兩指揮見管三百五人見闕三百六十二人
建昌軍兩指揮見管二百六十八人見闕二百九十九人
興國軍兩指揮見管一百八十四人見闕五百六十六人
南安軍一指揮見管二百五十人見闕六十人

已上不係將兵承今來朝廷指揮令帥司措置招
填闕額存留一半本廳便喚餘一半令本司別作

一項訓練勾抽使喚欲乞令逐州限一季攬闕額
招填如招填不足即從本司措置量增例物招填
訖發赴本軍填闕

一契勘本路自来招填禁軍每名例物錢三貫又絹一
疋今來物價高貴竊慮無人肯就招填今欲將諸州
闕額人數每名增錢一貫文作四貫文絹一疋今紐
計招填係將不係將共闕五千三百七十三人合用
錢絹下項

絹五千三百七十三疋

契勘轉運司見有本路上供絹一萬七千餘疋於該

州軍資庫管欵乞於數內截撥五千三百七十三
疋補充前項招軍例物支用

錢二萬一千四百九十二貫文

契勘本路諸州各有總制司錢與應副月補大軍錢
糧窠名不妨礙欲乞通融一路從本司取撥充前項
招軍例物支用

一契勘本路合招填闕額禁軍五千三百七十三人今
約合用錢糧下項

每一月合用

糧米六千八百七十七石六升

料錢一千五百六十八貫

衣賜

春衣

絹一萬七百四十六疋

紬八百四十疋

布三千一百一疋二丈

隨衣錢七千二百一十一貫六百四十一文

冬衣

絹一萬一千四百六十疋三丈

紬二千六百八十疋二丈

布八百四十一疋

綿六萬五千一百九十一兩

隨衣錢五千九百九十五貫一百九十二文

一歲通計合用

糧米八萬二千五百二十四石七斗二升

料錢一萬八千八百一十六貫文

絹二萬二千二百六疋三丈

紬三千五百二十七疋二丈

布三千九百四十二疋二丈

綿六萬五千一百九十一兩

隨衣錢一萬三千二百六貫八百三十四文

已上合用錢糧等數自浩瀚緣諸州所入財賦有限並係轉運司括責扣撥令認定月椿應副岳飛等大軍支遣除外別無龐餘案名錢物今承朝廷指揮招填闕額禁軍並係本路人額其錢糧自合本路應副若非特降指揮本路漕司通融副郎逐州既無可指擬贍養必不能遵奉招填額足欲乞候招到人數目令轉運司據招填到人數應副一契勘本路帥司以前自造到器甲昨係本司統制官祁超等軍馬關借拔帶使用其逐項官兵節次抽摘

赴都督府岳飛軍前盡數將帶前去見今關乏今承
朝廷指揮合用軍器令帥司一面措置造作使用如
有合行事件具條申取朝廷指揮本司見開坐名件
行下諸州令依應造作外所有合用錢物欲乞朝廷
特降新法度牒二百道應副支用候將來支絕日再
行申請

謝賜銀合茶藥表

臣綱言伏蒙聖慈特降中使傳宣撫問仍賜銀合茶藥臣
已望闕謝恩祇受訖者祇奉明綸起臨江渚遠近膺使衆
向日邊丁寧訓勞之辭稠疊寵接之禮王靈所逮士論增

榮中伏念臣頃以衰頹久安閑散誤膺方面之寄適當旱
暵之餘倉粟無儲士多飢色潢池有盜民未奠居自慙報
效之遲敢意撫存之厚靈茅貢於北苑珍劑出於尚方併
沐匪頒式昭殊獎此蓋伏遇皇帝陛下明並日月德合乾
坤憫臣下之勤勞極朝廷之禮貌致茲異數濫及非材臣
敢不勉自激昂少圖報稱除煩渴期有慰於人心蠲治
沉痾益務求於民瘼

謝還賜玉帶牙簡等表

臣綱言伏蒙聖慈以臣進到太上皇帝所賜玉帶玉束帶
牙笏一面御畫二軸特降睿旨還賜臣已望闕謝恩祇受

訖者抗章有請願還御府之珍被旨弗俞復拜匪頒之寵
賜雖云舊命實維新謝伏念臣遭遇休辰嘗與尚方之珍
賜奔馳一紀惟知十襲以祕藏奉以周旋不敢失墜荷明
恩而入覲蒙清問之下詢寶氣騰輝期復歸於天上物華
得地庶不落於人間伏蒙皇帝陛下體聖與仁寶慈及優
眷憐迂拙嘗調護於兩宮寵賁衰遲特便蕃於三錫載頒
舊物庸示新恩而臣晚景無堪難當異數壯心未已願效
微勞粹質溫純自慙比德之非稱古製正直誓將擊賊以
奚難臣無任

乞兵於舒斬黃州駐劄奏狀

勘會淮西蘄黃三州昨奉聖旨聽本司節制其逐州係在
江西大江之北各與偽齊地分鄰接正是緊要重地先蒙
朝廷除岳飛兼節制逐州緩急有以捍禦本司近為岳飛
已奉聖旨改授湖北京西路宣撫副使雖上項三州并本
路沿江興國軍江州並未有措置隄備竊慮賊情不測別
生窺伺遂具狀申朝廷乞速降睿旨措置施行續准都督
行府樞密院劄子備奉聖旨令岳飛依舊兼行節制蘄黃
三州本司照對除蘄黃州係岳飛兼行節制外所有舒州
元係淮西宣撫使司地分逐州即目並無軍馬防托緣防
秋在近唯江西沿江一帶接連舒蘄黃等州全然未有兵

備今來岳飛大軍將行起發往襄陽府劉光世大軍將行起發往廬州即舒蘄黃州愈更空虛若不預行措置深慮外寇乘間侵軼緩急無可支梧所繫利害非輕欲望聖慈詳酌特降睿旨下岳飛分撥軍馬四千人差近上統制官於蘄黃兩州駐劄劉光世分撥二千人差近上統制官於舒州駐劄將來防秋有警並許聽臣節制使喚庶幾臨時不致悞事

小帖子

臣契勘黃州對江南岸係鄂州武昌縣接連江西興國軍界正是本路控扼要害去處其武昌係屬湖北

地分每遇防秋禁朝廷降指揮專委湖北帥臣固守
欽乞朝廷更賜指揮剗下湖北路帥司預行措置武
昌沿江一帶水陸備禦之計庶幾緩急不失事機

宋丞相李忠定公奏議卷之四十九

宥丞相李忠定公奏議卷之五十

乞移總管虔州措置捉殺盜賊奏狀

勘會本路虔吉州管下民俗犷悍平日徂習為盜前後累蒙朝廷并本司遣發軍馬節次招捕過賊徒不少尚有餘黨時復嘯聚出沒不常緣虔吉州盜賊皆係土居頑惡不逞之人即與潰兵遊寇事體不同每有竊發動以千計所屬巡尉勢力不加便敢輕犯州縣肆行猖獗若聞重兵到來即復遠遁哨伏山谷官兵纔退依舊作過今來若非專差兵將於逐州閱習訓練就近措置卒難殄滅照對本路所管東南第六將兵係在虔吉州住營歲日見管三千八

百餘人及遂州各有土豪可以駕馭使喚本路有馬步軍副總管康隨合通管一路係將不係將軍兵可以專委前件職事兼本官見奉都督行府指揮差措置爰吉州界盜賊本司今相度欲權暫移副總管康隨前去駐劄專切提督兩州兵將依時訓練教閱武藝修治器甲及招填閑額人兵務要精熟足備仍就近取會見作過盜賊頭項如承關報即一面斟量調發措置招捕及申報本司其所至巡尉并將兵並聽節制使喚庶幾克頑之徒知所畏憚漸可消弭本司除已一面劄下隨依應起發前去外須至奏聞者乞下都督行府催促遣兵奏狀

契勘本司近為鄧次承據提刑司及虔吉州南安臨江軍等處申報管下見有諸頭項賊徒結集作過乞兵收捕本司已逐急差親兵權統領王彥將帶所部三百人隨逐副總管康隨前去措置招捕虔吉州南安軍未獲賊徒及分遣申世景官兵二百人令將官王勝部押前去臨江軍所詮縣措置鄒烏八等賊徒及於本軍差撥將官馬仙押三百人往吉州措置管下見有作過盜賊外緣本司見存軍兵大段數少今來作過賊火頭項不一委是關兵分撥前去捉殺已鄧次開具賊首姓名申奏朝廷及都督行府乞於近便處摘那差撥兵將三二千人前來相兼使喚續准

都督行府四月二十四日關勘會行府見議遣兵前去至
今未蒙差到今又據逐處申報有賊徒結集作過緣今來
正當我挿殺割禾稻之際竊慮諸處盜賊輕視帥司官兵
單弱恣行劫掠使良民不得安居有失歲計須至奏聞者
右謹件如前欲望聖慈詳酌本司累奏并今狀事理速降
睿旨下都督府催促捕那兵將三二千人前來本司應副
相兼使喚庶幾防秋已前累早撲滅免致滋蔓難制

小帖子

契勘虔州界見有曾六冠曾大候黃鐵鑽曾九唐四
謝魁七李洪劉宣吳添廖一長劉十二譚十二蕭我

洞謝天小鬼青唐賊已十九等并燒劫龍南縣等處
吉州界有曾太保郭小二尹使者周花二謀花三易十
二羅大蕭安世等袁州界王權蘇軍九等南安軍有
何少七吳守傳李收李迴等臨江軍新淦縣界鄒烏
八除謝鬼七已遁鄒烏八王權已殺獲外所有上件
未獲賊徒姓名已係前狀開具奏聞去訖伏乞睿旨

論賑濟劄子

臣昨者入覲伏蒙聖慈宣諭江西旱災飢民闕食使之推
行賑濟及至境上又奉親筆詔書令勸誘積米之家以其
食用之餘盡數出糶以濟流殍之苦臣仰體天意敢不夙

夜自竭以奉詔旨自到本路與監司協力行移州縣凡有
流徙闕食之民通融斛斗盡令給米收養共賑濟五萬九
十二人又給晉州縣遣官檢察令勸誘積米之家減價出
糴米麥穀二十一萬八千一百二十四石五斗其間亦有
願入米麥以助官中賑濟者臣已各項開具數目別狀奏
聞訖契勘本路連年旱歉去歲尤甚臣到任之初米一升
價錢至一百三十四文近來雨澤霑足早禾已熟米價頗
減新米一升止四五十文將來秋成決有可望之理此蓋
陛下勤恤民隱至誠惻怛聖德感召和氣之所致然今春
小民之本田畝有不曾種蒔者甚多人情方蘇未宜重取

更望朝廷寬假有以涵養之乃為得計昔周宣遇戍而懼側身修行而王化復行前日旱暵安知不為中興之寶在陛下特加聖意而已干冒天威不勝戰越

乞差軍馬劄子

臣竊見江西路環數千里為郡十有一為縣五十有三控引荆湖襟帶長越為上流重地去淮南京西道里不遠平時商旅由獨木渡江自光蔡以趨汴都最為徑捷當六朝時九江豫章皆重鎮屯兵選帥以臨之今朝廷保據江左審察形勢知此地之要害故與江東荆湖皆置大使付兵二萬假以重權錢糧優裕贍養不闕所以崇屏翰之勢為

長久之策也近年以來軍馬發隸他將錢米隨亦轉移疆場蕩然無捍禦之備倉稟糴然無蓄積之資而猶建置大帥是有名而無實其失本意遠矣且以江東荆湖論之建康有張俊一軍當塗有劉光世一軍武昌有岳飛一軍猶足以奮張軍聲以為翰蔽江西一路獨無兵將沿江上下千里之間殊乏控扼使敵人不來則已如其果來必乘間擣虛則無如江西者矣譬猶邪氣之傷人必由間隙盜賊之妄意必出無備豈可忽哉臣昨者入對嘗具劄子乞元降畫一指揮軍馬錢糧之干伏蒙聖慈察見本末有矜從之意降付朝廷至今未蒙懇副臣非不知方朝廷措置淮

旬恢復京東西未暇及此然但知進前不知備後非策之
得也今沿江所屯數十萬衆摘萬人以爲一路根本似未
爲多臣昨自行在將帶到申世景一軍纔千餘人分遣討
捕盜賊已差出三分之二見今諸郡竊發者紛紛未已正
緣兵力單弱不能鎮服所致而欲使之捍禦大敵豈不難
哉雖依述降指揮招補關額禁軍然未經訓練何可倚仗
非得正兵相兼使喚決誤國事又舒蘄黃三州實爲江西
屏蔽見聽本司節制亦無軍馬內舒州隸劉光世蘄黃州
隸岳飛臣近已具奏聞乞於劉光世軍中摘那二千人屯
駐舒州於岳飛軍中摘那四千人屯駐蘄黃州緩急聽臣

鄧制亦未奉指揮伏望聖慈特降睿旨下都督府如臣前
奏所乞差吳錫等軍一萬人充江西大使司軍馬仍令劉
光世岳飛分兵屯戍舒蘄黃州與江西相為表裏庶幾敵
人不敢窺伺一路生靈恃以無恐不勝幸甚臣以衰病難
當重寄已具奏乞依舊在外宮觀差遣必冀於從然不敢
以將去之故不為國家深慮至計伏望聖察

乞宮觀奏狀

右臣昨蒙聖恩除今任差遣臣以憂患之餘早衰多病三
具奏辭免皆蒙降詔不允及賜以親筆趣行臣不敢仰違
威命輒勉就道上章請觀正欲面奏難當委任之意既

瞻望清光特荷眷獎不容躑躅且蒙宣諭委以推行賑濟
聖心惻怛至于再三臣所以不敢固辭者亦欲少效尺寸
以報大恩而自到任以來適當倉庫匱竭新陳不接之際
夙夜憂慮啓處不遑用是宿疾間作動多眩瞶深慮職闕
復致人言今幸賑濟稍已就緒秋成有望人情漸蘇實無
規避之嫌敢瀝血誠仰干天聽伏望聖慈特加矜憐許令
依舊在外宮觀庶幾就閑可以養疾異時復被驅策誓極
糜捐以圖報稱

乞宮觀劄子

臣兩具奏聞乞罷帥守之任除一在外宮觀差遣未奉回

降指揮伏念臣自建炎初誤蒙任使適當艱難之時獨持
戰守之策孤危寡與屢遭謗誣仰賴聖明脫身九死今得
承乏方面親覩中興豈不知幸然志慮凋落多憂健忘拜
跪艱難近日以來頻在假故深慮妨廢職事益負素餐之
譏所以不敢久當分間之寄屢上請閑之章誠恐一有疎
虞誤陛下委任之意雖殺身不足塞責伏望聖慈哀憐特
降睿旨檢會臣前奏早賜矜允使得休養山林尋訪醫藥
於未死間獲觀陛下恢復中原攄憤千古臣之志願畢矣
干冒天威無任惶懼待罪之至

催差軍馬劄子

臣契勘近具劄子奏陳乞差元所請本路軍馬一萬人及於劉光世岳飛軍中捕那軍馬於舒蕪黃州駐劄未奉回降指揮近聞劉光世軍馬已起發往廬州岳飛軍馬已起發往襄陽府本路所乞軍馬未蒙都督行府差到沿江一帶並無控扼竊慮賊情狡獪或有窺伺乘間擣虛無兵應援深為可慮兼契勘岳飛大軍移屯襄陽所有錢糧並係本路應副經由蕪黃等州自沔部以趨襄漢實以本路為根本以蕪黃等州為咽喉之地萬一本路為賊所擾蕪黃等州為賊占據無兵捍禦即根本之地動搖錢糧無自而取咽喉之地阻塞糧道無自而通襄漢之軍坐見困乏為

害不細若待臨時申請決致誤事所有前後累奏所乞軍馬非獨止為本路之故伏望聖慈特降睿旨於都督行府見管軍馬中撥那差撥應副及令劉光世岳飛差兵前來舒贛黃州駐劄施行

乞截留王彥軍馬奏狀

契勘累准都督行府劄子緣本司申乞差撥防秋軍馬勘會行府見議遣兵前去關送照會今月初四日又准都督行府劄子緣本司申乞先次摘那將兵三二千人前來本司應副相兼捉殺盜賊使喚申聞事勘會已降指揮令王彥將帶兵馬前來行府約至七月間可到候到行府日即

量度差撥前來今關送照營右本司體問得王彥見荆南
府除存留營田人兵外將帶軍馬裝發舟船前來人數不
多約七月盡八月初間可到江州本司緣防秋闕少軍馬
及近據筠袁吉等州申報日有盜賊嘯聚作過關兵分頭
討捕已具奏聞并申都督行府樞密院乞截撥王彥軍馬
存留本路防秋及討捕盜賊使喚今准前項都督行府指
揮候王彥到日量度差撥前去竊慮王彥軍馬到得行府
已是秋深又復差撥前來須至冬月不唯往返虛費月日
又慮軍馬遠涉勞頓後期誤事除已再具申都督行府乞
截留王彥就便聽本司節制使喚於公江屯駐防托及分

兵前去厦吉等州討捕盜賊外伏望聖慈詳酌早降睿旨施行

小帖子

契勘本路盜賊除厦州南安軍日近有劉宣等攻破龍南縣等處作過外其餘諸縣盜賊頭項不一已曾開具申稟吉州近有湖南賊首王權見不伏招安依舊嘯聚作過袁州近有黃顛叔賊馬約一千餘人馬數十疋見在筠袁州界上作過委是急關人兵分頭討補伏乞聖察

契勘本司累申朝廷乞差防秋軍馬並蒙關送都督

行府今來行府近已移司前去泗上諸將軍馬並皆
發絕竊慮別無兵將可及本路所有王彥一軍已得
都督行府指揮差撥但須到行府方始發遣前來竊
慮迂迴有失指擬秋深或有緊急難使本司虛當一
路之責伏望聖慈出自睿斷許就便存留一路不勝
幸甚伏乞睿察

契勘王彥軍馬在荆南駐劄係是四川應副錢糧今
如蒙聖慈許截留本軍在本路防托使喚即乞下
本路都轉運司將係省不係省并上供錢米應副贍
給王彥一軍伏乞睿旨施行

宋丞相李忠定公奏議卷之五十

宋丞相李